

Discours d'Eirago pèr l'aparamen e la mantenènço de l'encierro à l'eiraguenco

Ço que demandan...

Gèns de bouvino, maintenèire, vengu de tout noste miejour, abali dóu meme la, sian d'uno memo terro, d'uno memo nacioun, ço que demandan vuei qu'un cop de mai lou Miejour es amenaça, es pas solumen que nous faguèsson toulerànci, que poudrien nous leva tre que se reguignara o que la « prouteitriço » cantara, ço que demandan es que nous faguèsson noste dre, dignamen e fieramen, à respèt de nost'eiritage, à respèt d'aquéli qu' antan se soun dreissa pèr faire bàrri, Moussu Mistral, Jousè d'Arbaud, lou Marqués e tant d'autre pèr sauva nosto liberta e manteni nòsti tradicioun.

Vaqui ço qu'es arriva, à l'ouro d'aro, au mens tres generacioun, li tres quart d'uno pouplacioun s'esquichon dins li vilo, es à dire que i'a quàsi la mita di gèns qu'an roumpu emé soun biais de viéure ancestrau e que se soun derraba de si racino.

D'aquéu chanjamen, passa de la vido païsano à la vido de la vilo, se n'en soun pas remés, sabon pus de que faire de si vido de misèri, viron, tournon, s'apassiounon pèr de farfantello, de plat de regardello e de vouiage à Pamperigousto pèr assaja de remplaça tóuti aquéli valour perdudo. Alor, desempièi uno vintenado soun intra dins uno epoco de retour à la naturo e que pèr countraste e lou mai estounant es que li messiounàri, li catau li mai arderous soun aquéli que, à l'epoco se soun desparti de la terro di draio pèr lou goudroun de la vilo e que voudrien vuei nous douna de leissoun.

Voulèn pas reveni sus la sempiternalo ópousicioun di gènt de la vilo contro aquéli di campagno, mai i'a uno lougico de tira de tout acò, e la lougico païsano es counsigudo, la lougico voudrié-ti pas que siguèsse aquéli que fan viéure nòsti campagno, que soun davans la realita di causo, li païsan, li bergié, li gardian e tóuti aquéli qu'aparon Prouvènço e Camargo, voudrié-ti pas que siguèsson éli qu'aguèsson priourita pèr douna lis avis valable sus la questioun.

Mai noun, l'óupinioun publico se fai pas vers nous autre, se fai de monte parton lis emissioun de televisioun, li rumour, soucitouso que d'uno causo, de pouplarityta e de faire de bèu-bèu à la majourita. Aquelo majourita coumpausado d'aquéli que volon rèn saupre qu'en Africo i'a la secaresso e que crebon de fam mai que soun esmougu pèr lou sort di canard tre que fai trop fre, d'aquéli autoumobilisto que cridon à hue e à dia tre que veson un fourestié que copo un aubre, acò

pèr faire regreia la fourest e qu'emé lou gas de si veituro n'empouisonon li bèsti e li planto e d'aquéli « Roubinsoun Crusoë » dóu dimenche que fan pas meme la diferènci entre de blad e de civado.

E lou mai es que soun qu'un meseioun, un meseioun e pèr se n'assegura, lou cridon bèn fort e que i'a rèn de miéus que ço que fan. Lou meseioun ! Mai nous autre, lou saben proun qu'es dins lou meseioun que i'a lou verme !

Avèn rèn contro éli, mai que vengon pas nous dire ço qu'avèn à faire, n'en gagnon toujours que mai, soun toujours que mai noumbrous, es vrai, se soun fabrica uno culturo que ié couvèn, vai bèn ! Mai, an pamens pas pèr autant lou dre de dispausa de nous-autre quouro ié pren l'envejo de nous amenistra uno soulucion finalo « bèn pensanto ». Nous sèmblo que poudrian nous metre d'acord e qu'uno relacoun bèn assetado entre nous autre sarié necite à l'espandimen de la soucieta. Redurre lou Miejour à la souleto fin de li faire manja, de ié servi de passo-tèms e de baigno-quiéu dóu tèms di vacanço sarié un apaurimen dramati. Déu i'agué outro causo qu'aquel estamen di causo, es tout un sistèmo de valour, uno culturo elaborado à cha pau à n'un'epoco mounte nòu persouno sus dès travaivon à la terro e nous autre, nous autre avèn touca l'eiritage de tout acò, d'un sabé, d'usage, de tradicioun, coume uno filousoufio d'un mounde, d'un art de viéure à faire lingueto e à tóuti li rèndre jalous.

Sian qu'uno minourita, sian quasi à mand de cabussa, un genoucide, un genoucide culturau es à mand d'esvali tóut'aquéli valour majouro. La bataio es pas gagnado, li mot soun pas trop fort mai lis avèn vist arriva e s'istala, nous coulounisa e nous rousiga plan-plan, arougant, en pretendèn nous impausa emé sis idèio, uno vesion di causo qu'à rèn de vèire emé nosto culturo.

Sian pamens nous autre lis eiritié, lis enfant dóu Diéu Mithra, li depousitari d'aquelo culturo, d'aquéli tradicioun e bèn mai, de forço esperitalo e acò vau bèn mai que touto uno armado ! E se tóuti tant que soun, e li vese aqui escoundu au mitan de nous autre, e se tóuti tant que soun an sis usage e soun biais de viéure, se devèn de faire assaupre que nous autre avèn li nosto. Sian uno eissepcioun, sian uno eissepcioun culturalo, grand bèn nous fague, lou cridèn bèn fort e n'en sian fièr.

Vaqui perqué vuei, davans tóuti, vous demandan d'auboura lou poung, coume aurié pas manca de lou faire l'ouuncle Laurèns, Laurèns Ayme, vous demandan d'èstre fièr de nòsti tradicioun e d'auboura lou poung en l'ounour de 2000 an de civilisacoun.